



PROSES tayamum dilakukan ke atas jenazah sebelum disolatkan.

# 33 jasad satu hari

## Pengurus jenazah Covid-19 korbankan cuti demi amanah

Oleh Mohd Jamilul Anbia Md Denin dan Muhaamad Hafis Nawawi  
am@hmetro.com.my

**Kuala Lumpur**

**“K**ebanjiran mayat pesakit Covid-19 memang melelitkan semua petugas barisan hadapan yang langsung tidak bercuti sejak beberapa bulan lalu.

“Namun saya anggap kerja ini (mengurus jenazah Covid-19) sebagai bakti perlu ditunaikan kepada negara,” ujar Pengurus Jenazah Jabatan Agama Islam Wilayah Persekutuan (Jawi) Nursyamsul Abdul Roni, 40.

Beliau mengakui kadangkala terasa kelesuan kerana terpaksa menguruskan je-

nazah mangsa Covid-19 setiap hari dalam jumlah yang besar.

“Namun memikirkan ini adalah tanggungjawab dan ‘lubuk’ pahala, saya cekalkan semangat dan hati untuk meneruskan tugas ini bersama ramai petugas lain.

“Kalau diikutkan memang sesiapa sahaja akan kepenatan bila melihat mayat mangsa Covid-19 tidak putus-putus dihantar ke unit forensik Hospital Kuala Lumpur (HKL),” katanya.

Nursyamsul berkata, sehingga kini dia dan petugas lain masih belum mengambil cuti dan akan bertugas

setiap hari menguruskan jenazah Covid-19 di Pusat Urus Jenazah Sementara (Pusara) di HKL.

Menurutnya, pihak Jawi akan memberi jadual tugasan setiap malam tugasan keesokan harinya.

“Selain bertugas pada awal pagi, saya sudah tetapkan setiap hari sekurang-kurangnya satu slot tugasan pengurusan jenazah dilakukan pada jam 2 petang atau 5 petang.

“Saya juga perlu bijak menguruskan masa bersama keluarga andai kata perlu keluar membeli barangan keperluan,” katanya kepada Harian Metro.

Beliau mengakui pernah berasa gusar jika dijangkiti virus Covid-19 ketika menguruskan jenazah mangsa.

Menurutnya, tugas dilakukannya itu membabitkan proses tayamum dan solat jenazah sebelum jenazah dimasukkan ke dalam van untuk dibawa ke kubur.

“Paling utama, saya dapat belajar bagaimana menguruskan jenazah mangsa Covid-19 sehinggakan kadangkala kepenatan itu tidak dirasai.

“Penat itu memang tidak dapat dinafikan, bayangkan jika perlu menguruskan 33 jenazah Covid-19 sehari. Namun tugas ini tetap diteruskan dengan tabah memikirkan kesedihan dialami ahli keluarga mangsa yang kehilangan insan tercinta,” katanya.

**“  
Kalau diikutkan  
memang sesiapa  
sahaja akan  
kepenatan  
Nursyamsul**